

ليه تآيس

وانت روحك
ناوية تطلع
اوعى تنسى
لحطة تقطع
خدها فيها
هناك وبرطع
عد لفلوسك
يابيه خدت
ايه قوللى
قوم شاور عليه
وانت ف الغسل
اوعى تنسى
للمراكب سوى مرسى
مية مهما غاسلة جتة
ريحة نتنة ازاي وليه

مافى مسك
ومافى عنبر ليه
تفكر انت ليه
عديت بتيه
وانت عالخشبة نصلى
ياما كنت انصح تمللى
صلى لاجل
يوم وفاتك
فين صيامك
او زكاتك فين
ثباتك خد
فلوسك واشتريه
وانت متشيع مشيع
كل شئ منك مضيع
ادعى ليك والا عليك
مافى حسنة القاها ليك
لاجل رحمة عند ربى
نفسى بس يرق قلبى

مستخبى موش لاقية
وانت نازل للتراب
كل مايايدك سراب
موش هتجنى الا الخراب
ما انت طول عمرك غراب
حتى قلبك ليه تعاديه
واحنا بنقفل عليك
مافى عندك ليك شريك
حتى عملك قال فكيك
يعنى تتحاسب لوحدك
مش هتهرب لا ده بعدك
كل شر القاك مالىه
لو تشوف
تعبانك اقرع
والا قبر عليك مولع
نفسك لو ساعتها ترجع
ايه ده يومها يبقى ينفع
نار جهنم بيك تلعلع

لو بركان دوب انت فيه
واما هتخلص عذابك
لحمك اتحول ترابك
ربنا بدل لجلدك
والزقوم هتكون منابك
واما هيقرّب حبابك
الشهادة ترد بابك
ترجع البسمة لكتابك
ربنا بالرحمة سابك
ليه تآيس تشتكيه